

【像戇仔个天才】葉秋菊原作

「人不可貌相，海水不可斗量」這句話來講阿明，實在盡對般¹。佢乜相信天公爺同你關忒一扇門，定著會撈你打開另外一扇窗。

見擺佢兜愛重新分班該下，心情就像老鼠跌落米缸肚，一重歡喜一重愁，歡喜个係做得熟事新朋友，愁个係毋知會有仰仔个人同佢共班？當記得開學該日，遠遠看著一個手癟癟腳跛跛个細佬仔行落教室肚，該儕人頭臥臥仔，嘴弛弛仔²緊行緊笑，看起來戇戇，佢胚想佢怕係行毋著教室也，愛去隔壁个資源班正著！

該細佬仔的對³坐在吾隔壁。先生特別同大家紹介這細佬仔，講佢安到張忠明，手腳較毋方便，愛打幫坐在厥脣頭个人，發揮同學愛，搵手照顧。張忠明？佢話著⁴係當聰明，險險笑出聲來，一想著新个一年愛同佢比比坐，面就端忒⁵一半。佢頭側側仔偷看佢，唉！係生到白淨白淨異清秀个細佬仔，總係透日仔口涎水澹

¹ 對般：音 dui ban^ˊ；契合、一致。

² 嘴弛弛仔：音 zoi ie^ˊ ie^ˊ e^ˋ；嘴咧得開開的。

³ 的對：音 dag dui；正巧。

⁴ 話著：音 fa do^ˋ；以為。

⁵ 端忒：音 fe^ˋ ted^ˋ；歪了。

澹汀汀⁶，撈頸根圍等該條涎丫仔⁷，汀到潦潦，分人看著目汁就會跌出來，同情心在吾心肝肚慢慢仔翻轉，佢定定仔幹轉頭同佢笑一下，佢試著佢異得人惜咧！

吾該班个綻剝頭⁸總係撩撩刁刁，奈冬瓜毋何，捉瓠仔來捋毛，看忠明好欺負，就學佢行路孔孔翹翹个樣仔，無就去撚厥屎脰，好性个阿明就目瞞瞞仔任人搥射，佢一肚个懊躁，當想行前去代佢出頭。

阿明當有志氣，同佢兜共樣上課，共樣寫作業，就寫字較食力，較慢板定定，學生仔該當愛做个本分，佢毋識懈怠過。有一日上數學，先生出一隻題目難過上天，吾頭那想到必也想毋出來，大家都額結結仔無人曉，哪會胚著阿明竟然毋使兩分鐘就算出來。大家目珠睜到大嬾粒，盆頭講到鉢也無人愛信，戇仔仰會變精也呢？原來佢係一個天才啊，起先話著佢係戇仔个佢敗勢到面紅濟炸，還想尋一隻空鑽落去唷！

見擺看著搞到昏天暗地毋知頭天个佢兜，同拿等隨身聽恬恬聽英文、嘴項迪迪凸凸背出一大串英文个佢，就會面紅，實在爭天差地啊！人講「一枝草一點露」，天公爺係公當个，雖然無分佢健全个圓身，毋過有分佢聰明个頭腦、上進个心，在未來个路項，大家都毋使為佢煩惱為佢愁哩！

⁶ 澹澹汀汀：音 dam^ˋ dam^ˋ din din；形容液體不停的自物體上滴下來。

⁷ 涎丫仔：音 lan^ˊ a^ˊ e^ˋ；圍在脖子上的圍兜。

⁸ 綻剝頭：音 can dog teu^ˋ；罵人頑皮鬼。